

आकाशवाणी रायपुर (छत्तीसगढ़)
प्रादेशिक समाचार (छत्तीसगढ़ी)

1810 गुरुवार

11.07.2024

प्रमुख समाचार –

- 1— केंद्रीय वित्त आयोग के अध्यक्ष ह आज रईपुर म मुख्यमंत्री अउ मंत्रीमंडल के सदस्य मन संग करीन बइठका।
- 2— केंद्र सरकार ह पीएमश्री योजना के तीसर चरण म छत्तीसगढ़ के बावन स्कूल ल करे हे सामिल।
- 3— सर्वोच्च न्यायालय ह नीट यूजी परीक्षा दू हजार चौबीस मामला के सुनवाई ए महिना के अटठारा तारीख तक बर कर देहे स्थगित।

केंद्रीय वित्त आयोग बैठक

केंद्रीय वित्त आयोग के अध्यक्ष डॉक्टर अरविंद पनगढ़िया ह आज रईपुर म मुख्यमंत्री विष्णुदेव साय अउ मंत्रीमंडल के सदस्य मन संग बइठका करीन। ए दौरान मुख्य सचिव अमिताभ जैन ह राज्य के संबंध म एक प्रस्तुतीकरण दीन। ए बेरा म आने-आने विभाग के अधिकारी मौजूद रिहीन। बइठका म बोलत डॉक्टर पनगढ़िया ह किहीन कि छत्तीसगढ़ म विकास काम तेजी ले होवत हे। विकसित भारत अउ विकसित छत्तीसगढ़ बनाय के संकल्प ल पूरा करे बर विनिर्माण इकाई के स्थापना म जोर देबर पड़ही।

उहें, बइठका म मुख्यमंत्री विष्णुदेव साय ह किहीन कि राज्य के कठिन भौगोलिक स्थिति के चलत अंधोसंरचना म जादा खरच आथे। ओमन किहीन कि माओवाद प्रभावित क्षेत्र म विकास काम सरल करे जात हे। नियद नेल्लानार योजना म शिक्षा, स्वास्थ्य, रदा, बिजली, पानी जइसन सुविधा ठीक करे बर काम करे जात हे। ओमन केंद्रीय वित्त आयोग ले प्रदेश के विकास खातिर वित्तीय सहायता के मांग करीन। ए मउका म प्रदेश के वित्त मंत्री ओ.पी.चौधरी ह घलो राज्य के वित्तीय स्थिति अउ जरूरत के संबंध म आयोग के आगू अपन बात राखिन।

एखर पहिली मुख्यमंत्री विष्णुदेव साय ले आज मंत्रालय म केंद्रीय वित्त आयोग के अध्यक्ष डॉक्टर अरविंद पनगढ़िया ह भेंट करीन। ए दौरान मुख्यमंत्री के वित्त आयोग के सदस्य संग आने-आने बिसय म गोठबात होइस।

खबर के मुताबिक काली संझा ले सोलहवां वित्त आयोग के दल छत्तीसगढ़ दौरा म हे। ए बेरा म वित्त आयोग के सदस्य जगदलपुर के घलो दउरा करही।

पीएमश्री योजना

केंद्र सरकार ह पीएमश्री योजना के तीसर पारी म छत्तीसगढ़ के बावन स्कूल ल करे हे सामिल। एमा पहिली ले बारहवीं तक के सैंतालिस स्कूल अउ कक्षा छटवीं ले बारहवीं तक के पांच स्कूल सामिल हे। एखर ले पहिली प्रदेश म पहिली चरण म दू सौ ग्यारा स्कूल ल पीएमश्री योजना म सामिल करे जाय के मंजूरी मिले रिहीस। पहिली पारी म पीएमश्री योजना म मंजूर करेगे स्कूल ल अपग्रेड करे जाय के काम सुरू हगे हे। ए स्कूल म स्मार्ट क्लास रूम गणित अउ विज्ञान बर आधुनिक लैब, खेल सुविधा अउ डिजिटल लाइब्रेरी जइसन सुविधा करे जाही।

खबर के मुताबिक छत्तीसगढ़ म पीएमश्री योजना के सुभारंभ उन्नीस फरवरी दू हजार चौबीस के केंद्रीय शिक्षा मंत्री धर्मेन्द्र प्रधान करे रिहीन।

सुप्रीम कोर्ट—सुविधा

भारत के मुख्य न्यायाधीश डी.वाई. चन्द्रचूड़ ह आज नई दिल्ली म सुप्रीम कोर्ट के मुख्य परिसर म एक नवा फाइलिंग काउंटर अउ सुविधा केंद्र के उद्घाटन करीन, जउन सीर्ष अदालत के न्याय तक पहुंच मिसन के तहत स्थापित करे गेहे। नवा केंद्र न्यायालय म काम-काज ल व्यवस्थित करे बर वकील मन ल उंखर मामला ले जुड़े जम्मों दस्तावेज तक केंद्रीयकृत पहुंच दीही। मुख्य न्यायाधीश चन्द्रचूड़ ह ए मउका म किहीन कि बहु सुविधा केंद्र भारत के नागरिक मन ल सुप्रीम कोर्ट कोति ले मिलइया सेवा के गुणवत्ता ल बढ़ाही।

सुप्रीम कोर्ट—नीट यूजी

सर्वोच्च न्यायालय ह नीट यूजी परीक्षा दू हजार चौबीस मामला के सुनवाई ए महिना के अट्टारा तारीख तक बर स्थगित कर दे गेहे। भारत के मुख्य न्यायाधीश डी.वाई.चन्द्रचूड़ के अगुवाई वाले पीठ ह पार्टी मन ल केंद्र अउ एनटीए कोति ले दायर हलफनामा म अपन सोच दाखिल करे म सक्षम बनाय बर स्थगन दीन।

शीर्ष अदालत म आज विवादित नीट यूजी दू हजार चौबीस मेडिकल प्रवेश परीक्षा ले जुड़े याचिका म सुनवाई होना रिहीस। एमा पांच मई के परीक्षा के बेरा गड़बड़ी अउ कदाचार के आरोप लगइया अउ फेर ले परीक्षा कराय के मांग वाले याचिका सामिल हे। बुधवार के प्रस्तुत ए हलफनामा म केंद्र ह केहे हे कि सर्वोच्च न्यायालय के निरदेस के मुताबिक शिक्षा मंत्रालय ह आईआईटी मद्रास ले नीट यूजी के नतीजा के डेटा के विस्लेसन के बात करे रिहीन।

एक पेड़ मां के नाम

मुख्यमंत्री विष्णुदेव साय ह 'एक पेड़ मां के नाम' अभियान म नवा रईपुर म महावृक्षारोपण अभियान सुभारंभ करीन। ए बेरा म मुख्यमंत्री ह पीपल, नीम, हर्षा बहेरा के पौधा रोपिन कारीकरम के अगुवाई वनमंत्री केदार कश्यप ह करीन। ए अभियान म मंत्रीमंडल के सदस्य समेत स्कूल पढ़इया लइका, पुलिस, सुरक्षा बल के जवान अउ वन विभाग के लोगन मन अपन सहभागिता दीन।

विधानसभा समिति—बैठक

छत्तीसगढ़ विधानसभा परिसर म आज चालू वित्तीय बछर बर गठित वित्तीय समिति के संयुक्त बैठका सिरागे। बैठका म विधानसभा अध्यक्ष डॉक्टर रमन सिंह, लोक लेखा समिति के सभापति डॉक्टर चरणदास महंत, प्राकलन समिति के सभापति अजय चंद्राकर, सरकारी उपक्रम संबंधी समिति के सभापति अमर अग्रवाल, स्थानीय निकाय अउ पंचायती राज लेखा समिति के सभापति धरमलाल कौशिक अउ समिति के सदस्य मौजूद रिहीन।

बैठका म विधानसभा अध्यक्ष डॉक्टर रमन सिंह ह किहीन कि एसो वित्तीय समिति म दू पूर्व विधानसभा अध्यक्ष अउ बांचे दू समिति म वरिष्ठ सदस्य सभापति के रूप म नामित हवय। ए बैठका सदस्य मनके अनुभव अउ संसदीय ज्ञान के फायदा हम सबो ज्ञान ल मिलही।

खबर के मुताबिक विधानसभा म इक्कीस समिति हे। संसद अउ विधान मंडल के बहुत अकन काम लघु सदन के रूप म ए समिति कोति ले करे जात हे।

नये कानून—जागरूकता

पाछू एक जुलाई ले देसभर म तीन नवा आपराधिक कानून प्रभावी होंगे हे। ए नवा कानून ल लेके प्रदेशभर म कतकोन जागरूकता कारीकरम होवत हे। आज सूरजपुर म कलेक्टर रोहित व्यास अउ बड़का पुलिस अधीक्षक एम.आर. आहिरे ह पत्रकार मन ल नवा कानून के संबंध म जानकारी दीन।

उहें, गौरेला—पेण्ड्रा—मरवाही जिला म घलो नवा कानून के संबंध म एक जागरूकता कारीकरम राखे गीस। ए दौरान पुलिस नियंत्रण कक्ष गौरेला म होय कारीकरम म अतिरिक्त पुलिस अधीक्षक ओम चंदेल, उप पुलिस अधीक्षक दीपक मिश्रा अउ निकिता तिवारी ह नवा कानून के संबंध म विस्तार ले बतइन।

ओति, नारायणपुर जिला म पुलिस अधीक्षक कार्यालय म जिला स्तरीय कार्यसाला राखे गीस, जेमा प्रभारी पुलिस अधीक्षक शंकरलाल बघेल, अतिरिक्त पुलिस अधीक्षक अउ जिला लोक अभियोजन अधिकारी प्रेमचंद्र शुक्ला ह पत्रकार मन ल नवा कानून के संबंध म जानकारी दीन।

माओवादी—आत्मसमर्पण

दंतेवाड़ा जिला म आज तीन झिन माओवादी मन ह आत्मसमर्पण करीन। एमा दू झिन उपर एक—एक लाख रूपिया के ईनाम घोसित रिहीस। ए माओवादी मन ह पुलिस अधीक्षक गौरव राय के आगू आत्मसमर्पण करीन हे। ए सबो माओवादी कोंटा अउ कटेकल्याण क्षेत्र म सक्रिय रिहीन। समर्पण करे माओवादी मन उपर पेड़ कांटे रद्दा ल खोदे अउ नक्सली बैनर पोस्टर लगाय के घटना म सामिल रहय के आरोप हे।

देवेन्द्र यादव—नोटिस

बलौदाबाजार हिंसक उपद्रव मामला म पुलिस ह भिलाई विधायक देवेन्द्र यादव ल दूसर घांव नोटिस भेजे हे। देवेन्द्र यादव ह ए नोटिस के खिलाफ हाईकोर्ट म याचिका दायर करे हे। खबर के मुताबिक पाछू दस जून के बलौदाबाजार के कलेक्टोरेट अउ पुलिस अधीक्षक कार्यालय म आगजनी अउ तोड़फोड़ के घटना होय रिहीस। पुलिस ह ए मामला म एफआईआर दर्ज करे रिहीस हे अउ उपद्रवी मनके पहिचान करके, ओमन ल गिरफ्तार घलो करे हे।

प्रबल प्रताप सिंह जुदेव—घायल

भारतीय जनता पार्टी के प्रदेश मंत्री प्रबल प्रताप सिंह जुदेव एक रद्दा दुर्घटना म घायल होंगे हे। उंखर इलाज राजधानी रईपुर के एक प्राइवेट अस्पताल म चलत हे। मुख्यमंत्री विष्णुदेव साय ह श्री जुदेव के जल्दी स्वस्थ होय के कामना करीन हे।

मौसम

अवइया चौबीस घंटा म प्रदेश के कतकोन जघा म हल्का ले मध्यम बरसा होय या गरज—चमक संग छींटा बौछार हो सकत हे।

उहें, एक—दू जघा म अंधड़ चले अउ गाज गिरे के आसंका जताय गेहे। मौसम विभाग के मुताबिक एक मानसून द्रोणिका बीकानेर, जयपुर, उरई, बलिया, आसनसोल, बगातीहोत, उत्तर पूर्व बंगाल के खाड़ी तक बने हे। उहें, एक चक्रीय —चक्रवाती घेरा ओड़िसा के उपर बने हे। जेखर परभाव ले प्रदेश म तेरह जुलाई ले बरसा म बढ़वार होय के संभावना हे।

